

福爾摩沙的手指－東沙群島

可能真濟人知影咱臺灣佇古早古早以前予歐洲人號做是「福爾摩沙」，ah 若臺灣海峽著叫做「福爾摩沙海峽」。一般攏認為彼是佇十六世紀中期，葡萄牙的水手看著臺灣島的嬌煞擋袂牢喊出「Ilha Formosa!」(意思就是美麗的島嶼)，雖然這種講法佇現在已經無法度證實，毋過會使確定的是，佇幾百年前的古地圖內底，就佇這馬琉球群島的南片，確確實實有畫著福爾摩沙這個島嶼。既然福爾摩沙是臺灣，若按呢，福爾摩沙的手指到底是佇佗位呢？這跤手指就因佇離臺灣的高雄港差不多 240 海浬（444 公里）彼咧遙遠的所在，遐就是「東沙群島」。

東沙群島也就是「東沙環礁」，一般人可能攏沒聽過這個所在，更加毋知影伊屬於咱臺灣，就和釣魚臺列嶼全款，攏是咱臺灣的領土。東沙群島是南海諸島的四大群島之一，整個東沙群島的海域面積大約是五千平方公里，佇南海諸島內面算講是大島之一，嘛佇咧南海諸島的上北片。佇 1979 年劃歸高雄市旗津區的中興里。東沙群島主要是由三個珊瑚環礁構成，主島是「東沙島」，島嶼的形狀生做干焦馬蹄、牙，所以古早有「月牙島」的稱呼。東沙島的中央包圍海水成為一個內海，全島的四箍圍攏是礁盤。東沙群島因為海洋生態豐富，所以政府佇咧 2007 年的時，成立「東沙環礁國家公園」，東沙環礁國家公園的範圍包含著東沙島以及周圍的環礁，這是咱臺灣第七座的國家公園，而且伊猶閣是目前臺灣總面積上大的國家公園。東沙群島的形體好親像是一跤手指，ah 若東沙島就是手指頂頭上蓋金、上蓋嬌的寶石。

東沙島上的動、植物種類真少，植物攏總是熱帶性的植物，動物以露螺、蟬仔、昆蟲、蜘蛛為主，真濟攏是其他所在無，東沙島才有的罕有品種。鳥仔大概有百外種，差不多攏是渡鳥較濟。島上的地下水算真充足，毋過水有較鹹，不適合直接提來淋，島中心附近的水較無遐鹹，所以就曾用來灌溉或者是洗衫。雖然島上有儉水池和海水淡化機，毋過煮飯和淋的水嘛是著愛對臺灣運過去。電力這方面有電廠會當提供島上所有的電力供應。目前東沙島並無一般的民眾蹓佇遐，毋過有海巡署的官兵駐守佇島上，猶閣有一部分國防部的空軍和海軍。現在的東沙島因為算是國家公園的範圍，所以海洋國家公園管理處也有佇當地設管理站，這幾年時常有學者、保育員佇遐做研究以及復育生態。但是，因為生態保育的關係，東沙島並無對向一般的民眾開放觀光。

莫看東沙島無起，東沙島雖然細罔細，但是島上有機場、小艇碼頭、氣象觀測站、東光病院、漁民服務站、郵局等等的建設，這若是無親目睷所看過，我嘛絕對無啥袂相信。東沙島的路大部分攏是點仔膠路，毋過路況無外好。一般蹓佇島上的官、士、兵攏嘛騎孔明車，聽 in 講若是想欲騎孔明車環東沙島，時間普略仔愛開三十分鐘才騎會了。因為東沙島海岸四周圍攏是礁岸，大型的船隻無法度倚近，必須要先停佇外海搬小船了後才有辦法會使靠岸，彼時我坐海巡署三千噸級的巡防救難艦「高雄艦」到東沙環礁的外海，嘛著愛換細台船才會使順利上

岸。島上有卡車、貨車、吊車這干焦無啥稀罕，上蓋趣味的是，東沙島上竟然有公車，這絕對是一般人想袂到的，高雄市政府有送一臺公車去到東沙島，這臺特別又閣是唯一的公車就叫做「東沙1號」，島上的景點頭前閣有公車站牌咧！島上的飛機場就是東沙機場，這馬往復臺灣和東沙島的飛行機主要有軍機和民航機，軍機就是一般人所知的空軍C-130運輸機，主要是補給物資和公務所用；民航機就只有立榮航空的客機，每禮拜四攏有航班往復東沙島和高雄國際機場，這是予駐防人員坐的限定班機，一般人是無法度坐的啦！

東沙島不只是自然生態豐富爾爾，文化古蹟和人文景觀嘛真值得欣賞。像「東沙遺址」是中央研究院的教授所發現，伊由東沙島內海北岸出土的文物推測，古早就有先民定定佇遮咧活動。「東沙大王廟」主要是拜關公，聽講彼時陣伊的神像坐獨木舟漂流到島上，神像竟然攏無沐著半滴水，非常的神奇，所以當年駐守佇彼的官兵就合力起廟服祀，將伊當作是東沙的守護神，當年彼隻獨木舟這馬猶閣保存佇廟邊。大王廟也有奉祀海上女神—媽祖。島上的東沙巡防指揮部和「月牙軒」是新起的，起了真清氣嘛真嬌。島上閣有真濟立碑，親像『南海屏障碑』、『南海明珠碑』、『漢疆唐土碑』、『東沙島島碑』、『東沙地籍測量紀念碑』等等。東沙精神堡壘全島逐个所在攏看會到，用途免講嘛知影是為著欲鼓勵軍心。

東沙群島擁有豐富的海洋資源，是目前臺灣政府佇南海唯一而且完全實際控制的群島水域，上重要的是，伊是通往南海群島的樞紐，地理位置非常要緊。面對周圍國家的軍事威脅，政府的南海戰略到底欲按怎設計，才會當有效來抵抗威脅，化解南海群島的危機是現在必須愛慎重思考、研究的重點。我認為頭一步應該愛先予人民普遍攏了解咱的領土範圍，強化國人的愛國情操，煞落來是鼓勵、宣導國人願意投入、關心南海的情勢發展。若是會當予人民閣了解著駐守佇東沙島、太平島官士兵的艱苦，按呢咱的社會無的確就會閣較和樂。達成軍民合作，支持國防政策是上蓋理想的最終目標。